



KOMISAUN REFORMA FISKAL

10 Novembru, 2016

PR#8

Komunikadu ba Imprensa

Governu promote kombate korupsaun publiku ho privadu iha Alfandegas liu husi Deklarasaun Arusha

Dili- Konsellu Ministrus hakat pasu importante ida atu kombate korupsaun iha Alfandegas liu husi adopta Deklarasaun Revisaun Arusha. Deklarasaun ne'e hanesan parte importante husi esforsus governu nian atu reforma nasaun nia Autoridade Aduaneiru liu husi Komisaun Reforma Fiskal.

"Integridade hanesan aspetu kritiku ba administrasaun Aduaneiru hotu iha mundu tomak no korupsaun limita tebe-tebes kapasidade Alfandegas nian atu koleta reseita, proteje fronteiras ho kontrola movimentu merkadorias", dehan Vise-Ministru Finansas Helder Lopes. "Deklarasaun rekoñese problema ne'e no estabelese grupu regulamentus ho guiaun atu tulun Alfandegas prevene ho kombate korupsaun".

"Prinsipiu hirak hakerek iha Deklarasaun aplika ba instituisaun setor públiku ho privadu hotu. Ami hein ida ne'e fo sinal ba setor privadu katak Governu serius ba kombate korupsaun. Koperasaun ho setor privadu atu tulun inisiativa importante ne'e kritiku tebes atu fasilita komersiu", kontinua Vise-Ministru Lopes.

Autoridade Aduaneiru Timor-Leste sei hahu kedas implementa prinsipiu hirak hakerek iha Deklarasaun Arusha. "Aprovasaun ba Kodigu Aduaneiru Foun ho Deklarasaun Arusha estabelese fundasaun solidu ida atu harii integridade iha Alfandegas", dehan Fernanda Borges, Kordenadora Komisaun Reforma Fiskal, "Komisaun Reforma Fiskal ho Alfandegas hola hela pasus pratiku hanesan prepara kodigu konduta foun, prosedimentus aduaneiru, introduz sistemas TI foun ho halo investimentu boot iha desenvolvimentu rekursu umanus."

Importansia ba integridade iha Alfandegas

Administrasaun aduaneiru iha mundu tomak iha knaar xave atu fasilita komersiu, koleta reseitas, proteje comunidade ho seguransa nasional. Nune'e, se la iha integridade iha Alfandegas bele altera oportunidades komersiu ho investimentu, enfrakese konfiansa públiku nian iha administrasaun governu no ikus liu prejudika ka estraga moris-diak sidadaun hotu nian. Integridade hanesan pre-rekizitu ba funsionamentu diak iha administrasaun Aduaneiru ida.

Konaba Deklarasaun Revisaun Arusha

Iha 2003, Organizasaun Aduaneiru Mundial (OMA) hamutuk ho nia estatus membru hotu diskuti fator xave sira atu prevene korupsaun ho aumenta nivel integridade iha Alfandegas. Rezultadu maka Deklarasaun Revistu Arusha- Deklarasaun original adopta iha 1993. Liu husi adopta Deklarasaun ne'e, estatus membru OMA nian promete hadia integridade liu husi auto-avaliasaun, planeamentu asaun, implementasaun ho avaliasaun. Timor-Leste sai mumburu OMA iha tinan 2003

Konaba Komisaun Reforma Fiskal

Komisaun Reforma Fiskal hanesan organismu tekniku estabelese husi Sextu Governu Konstitusional Timor-Leste, Rezolusaun no. 26/2015, ho mandatu atu avalia formas reseita atual ho foun hotu. Harii integridade iha Alfandegas hanesan área prioridade xave ba reformas iha Autoridade Nasional Aduaneiru.

Atun hetan tan informasaun, favour kontata: *Cecilia Tilman Gonçalves, Komisaun Reforma Fiskal,*
iha +670 7727 6436, ctgoncalves@mof.gov.tl